

**BOSNA I HERCEGOVINA**  
**Federacija Bosne i Hercegovine**  
**Tuzlanski kanton**  
**OPĆINA GRAČANICA**  
**OPĆINSKO VIJEĆE**

**Broj predmeta:** 01-05-02834-2017  
**Broj akta:** 01EN-001  
Gračanica, 31.8.2017.. godine

**Z A P I S N I K**  
**SA 9. SJEDNICE OPĆINSKOG VIJEĆA GRAČANICA**

Održane dana 29. 06. 2017. godine u sali za sjednice nove zgrade Općine Gračanica sa početkom u 11,00 sati.

Početak sjednice je prisustvovalo 22 člana Općinskog vijeća. Odustni su: Dizdarević Kemal, Dedić Dino, Šehić Edin, Ismet Nišić, Adem Aljić, Džebo Senahid, Ibrišević Edin i Mujić Alen.

Sjednicom je predsjedavao Nihad Krajinović, predsjedavajući Općinskog vijeća zajedno sa zamjenikom Almedinom Devedžićem i sekretarom Tukulj Dženanom.

Zapisnik vodila Mevlida Naimkadić, a vršilo se i tonsko snimanje sjednice.

Pored članova Vijeća sjednici su prisustvovali: Općinski načelnik, Općinski pravobranilac, šefovi službi za upravu, izvjestioci po pojedinim tačkama dnevnog reda, te član Etičke komisije i predstavnici sredstava informisanja.

Predsjedavajući Vijeća je dao na raspravu Zapisnik sa 8. sjednice Općinskog vijeća.

Učesnici u diskusiji su:

**Alen Ibrišević:**

“Ja sam zamoljen od kolege Edina Ibriševića koji danas nije mogao da prisustvuje sjednici. U zapisniku ima greška na stranici 16 zapisnika, u tekstu gdje je diskutovao Edin Ibrišević. U zadnjoj rečenici stoji, da se izbacuje jedna žena iz Odluke. Nije jedna, nego treba da stoji “jedina” žena. Pa da se to ispravi”.

**Nejra Hadžić:**

“Imamo ispred Kluba SDA prigovor na zapisnik sa 8. sjednice Općinskog vijeća i zahtjev za tonskim snimkom dijela sjednice. Iščitavajući zapisnik sa 8. sjednice Općinskog vijeća Gračanica uočili smo da u zapisniku nisu navedeni poimenični vijećnici Općinskog vijeća Gračanica, kada su neposredno pred izjašnjavanje o amandmanima na tačku 1 dnevnog reda svjesno i najavljeno napustili sjednicu Općinskog vijeća, kao i trenutak njihovog povratka na sjednicu. S toga tražimo da se u zapisnik uvedu imena vijećnika koji su napustili sjednicu kao i momenat njihovog povratka”.

Predsjedavajući Vijeća je konstatovao da je sjednici pristupio i Edin Šehić, te je u tom momentu bilo prisutno 23 člana Općinskog vijeća.

Primjedba Edina Ibriševića je usvojena jednoglasno.

Primjedba Kluba vijećnika SDA usvojena je sa 18 glasova "ZA" i 5 "SUZDRŽANO".

Zapisnik uz primjedbe, usvojen je sa 21 glasom "ZA" i 2 "SUZDRŽANO".

Predsjedavajući Vijeća je elaborirao prispjele odgovore na pitanja i inicijative koje su kandidovali vijećnici na ranijoj sjednici.

Nova pitanja i inicijative kandidovali su:

**Mirsad Čamdžić:**

"Nemojte mi zamjeriti, ukoliko ova inicijativa nije formulisana onako kako treba, mislim da je suština bitna i da ćemo se razumjeti. Naime, ovu inicijativu sam kandidovao na sjednici Kolegija Općinskog vijeća Gračanica, održanoj u srijedu 22. juna 2017.godine i dobio usmenu saglasnost da inicijativa ide pred vas, poštovane kolegice i kolege. Tražim da se na avgustovskoj sjednici na dnevnom redu nađe tačka: Analiza načina raspodjele prihoda od Tuzlanskog kantona prema Općini Gračanica i da se vijećnici/vijećnice na današnjoj, devetoj sjednici OV izjasne o ovoj inicijativi. Naime pod ovim smatram da treba izvršiti analizu raspodjele prihoda u tri budžetske godine (2014.-2017.) u skladu sa važećim zakonskim regulativama, i grafički, tabelarno, ili narativno prikazati način raspodjele prihoda za Općine Kantona, korištenjem postojećih kriterija. Pošto vrijednost postoji samo ako je uporedna, poređenjem primitka u budžet i ulaganja od strane TK u pojedine općine, biće nam jasnije kako mi stojimo u toj relaciji.

U svojoj Informaciji o raspodjeli prihoda od indirektnih poreza po kantonima u Federaciji BiH, pisanoj u martu 2016.godine Vlada TK izražava negodovanje prema Federalnoj Vladi. Samo dva citata iz ove Informacije koju je pisala Vlada TK:

"Zakon o pripadnosti javnih prihoda na teritoriji Federacije BiH kojim je uređena pripadnost javnih prihoda na teritoriji Federacije BiH od svog usvajanja je nepravedan i štetan po građane Tuzlanskog kantona".

I drugi citat:

"Tuzlanski kanton sa najvećim brojem stanovnika, brojem učenika u osnovnim i srednjim školama (a što su i osnovni kriteriji za izračun učešća u raspodjeli) uz podatak o površini teritorije ostvaruje najniži prihod po stanovniku".

Tako se Vlada TK žali na podjelu sredstava iz Vlade F BiH.

Sa druge strane Vlada TK se po svemu sudeći, ponaša isto kada je ona u "poziciji moći". Ovo su informacije sa kojima raspolazem, a Vama predstavljam kao ilustraciju teme o kojoj trebamo raspravljati:

Plan Direkcije za ceste TK: u 2016-oj Direkcija je u Banoviće uložila oko 2 miliona KM, Živinice 1 milion, u općine Teočak i Sapna također oko 1 milion KM, dok je na našoj Općini Gračanica pripalo samo 350 hiljada KM. Sličan trend je najavljen i u raspodjeli 5 miliona KM za 2017.godinu: Živinice oko 2 miliona KM, Banovići 1 milion KM, Teočak i Sapna 700 hiljada KM, a Gračanica ponovo samo 350 hiljada.

Smatram da je za ovo posebno zainteresiran i Općinski načelnik Nusret Helić.

Tražim od nadležne službe da procijeni šta sve Vlada TK ulaže u pojedine Općine kada je u pitanju putna infrastruktura, vode, škole, objekti, povrat raznih poreza i slično i da nam pripremi informaciju o tome kako bi mogli razmotriti ovu temu na narednoj, avgustovskoj sjednici OV Gračanica. Ja bih zamolio predsjedavajući, da se ovoj inicijativi mi izjasnimo o čemu smo i na Kolegiju razgovarali. Da bi vijećnici prihvatili da se ide u ovom pravcu i da se ova tačka nađe na avgustovskoj sjednici Općinskog vijeća Gračanica".

### **Demir Milkić:**

“Ja za današnju sjednicu imam dvije inicijative. Prva inicijativa glasi:  
Podnosim inicijativu za postavljanje usporivača brzine u Ulici Riječka.

Obrazloženje:

Ljetna sezona je u toku, a Ulica Riječka je prepoznatljiva kao okupljalište mladih osoba. Međutim, iako nije toliko opterećena saobraćajem, ulica ima pravac koji je pogodan za razvijanje velike brzine gdje isključivo mladi u kasnim satima demonstriraju snagu svojih auta. Zbog toga u ovoj ulici su prioritet usporivači brzine. U zadnje dvije godine desile su se dvije saobraćajne nesreće uistinu lakše, ali svaka nova noć je šansa da se dogodi nešto takvo. Stoga ovaj prijedlog nije bezazlen, te bi zaista smanjio rizik i priuštio sigurnost svim građanima.

Druga inicijativa je:

Predlažem izgradnju info panoa Općine Gračanica koji bi bio postavljen u centru grada.

Obrazloženje: Informativno-interpretacijski panoi su elementi urbane opreme koji se postavljaju u gradskim središtima u svrhu davanja informacija građanstvu i turistima o važnim lokacijama i kulturno povjesnim znamenitostima kao i obavijestima. Važna je njihova turistička funkcija jer istodobno olakšavaju snalaženje u gradu te upozoravaju na postojanje određenih znamenitosti. Sadržaj ovog panoa treba biti jednostavan, zanimljiv i vizuelno atraktivan i on bi svakako uljepšao našu čaršiju. Postavljanje info panoa direktno utječe na očuvanje kulturne baštine, promociju i podizanje opće obrazovne i kulturne razine kako domaćih tako i stranih posjetitelja. Lokaciju predlažem centar grada-gradski park umjesto stare oglasne ploče u skladu sa njom. Smatram da prostor grada treba nadopunjavati novim sadržajima od javnog interesa, a prijedlog info panoa upravo je na tom tragu”.

### **Džemal Jukan:**

“Ja pokrećem jednu inicijativu koju upućujem Općinskom vijeću, odnosno Kolegiju Vijeća:

Pokrećem inicijativu za donošenje Odluke o izmjenama i dopunama Statuta Općine Gračanica, kao i Poslovnika o radu Općinskog vijeća.

Obrazloženje: Na prvoj konstituirajućoj sjednici Općinskog vijeća donešena je Odluka o izmjenama i dopunama Statuta Općine Gračanica. Tada je insistirano na promjeni samo jednog člana Statuta (što nije dobilo potreban broj glasova), a da će se sve druge predložene izmjene naknadno dobro iz analiziraju te da se na jednoj od narednih sjednica zauzimaju stavovi po istim.

Obzirom da je prošlo više od šest mjeseci i od zadnje Odluke, pokrećem inicijativu da se donese Odluka o izmjenama i dopunama Statuta Općine Gračanica, da se provede kvalitetna javna rasprava kako bi došlo do najboljih rješenja.

Paralelno sa ovom aktivnošću predlažem da se ide i sa izmjenama i dopunama Poslovnika o radu Općinskog vijeća jer ima opravdanih razloga za to. Evo samo jedna inicijativa kolege Čamdžića, u Poslovniku o radu nije precizirano, kako jednu inicijativu koju vijećnik iznosi ovdje, i evo traži da se Općinsko vijeće izjasni o njoj. Nije procedura razrađena, tako da ima potrebe za izmjenama i dopunama, da bi nam ti akti bili kvalitetniji”.

Sjednici je pristupio i Alen Mujić, pa je prisutno 24 člana Općinskog vijeća.

### **Fadil Mešić:**

“Ja imam jedno vijećničko pitanje i inicijativu. Vijećničko pitanje upućujem načelniku, a ono glasi:

U ime građana Nurkići-Malta-Javor i građana romske nacionalnosti sa Grabovca, postavljam sljedeće vijećničko pitanje:

Dokle je došlo useljenje građana sa Grabovca u dvije stambene zgrade u naselju Javor, zbog čega je zaustavljena gradnja kanalizacione mreže za pomenute zgrade, a ljudi u okolnim kućama blokirani?

Obrazloženje:

Iako se najavljivalo da će se 12 porodica romske nacionalnosti sa Grabovca u nove stanove useliti još za Novu 2017.godinu, to se nije desilo.Njima je pismenim putem naređeno da sami poruše nelegalno izgrađene kuće, što su oni i u dobroj mjeri uradili.Pošto su mnogi od njih ostali bez ikakvog krova nad glavom, sada nemaju gdje živjeti, pa spavaju u kombijima i napolju.

Iz tih razloga nastao je problem za mještane Malte i Nurikića.Zbog radova na iskopu kanalizacione mreže za pomenute dvije stambene zgrade namijenjene romima sa Grabovca, ova naselja su blokirana.Radovi su započeti, pa iz nepoznatih razloga zaustavljeni.

Vijećnička inicijativa glasi:

Podnosim vijećničku inicijativu za uređenje grada manjim zahvatima i sa malim sredstvima.

Obrazloženje: s obzirom da smo na prošloj sjednici Općinskog vijeća donijeli Odluku o proglašenju Gračanice gradom i da će vrijeme koje ćemo imati za ocjenu validnosti naše od odluke od strane Federacije BiH, brzo proći, već sada je potrebno krenuti sa aktivnostima na uređenju grada, bar onim potezima koji ne zahtijevaju velika ulaganja, velike investicije, kako bi grad dobio bolji, ljepši izgled, dobio imidž grada.

1.Građani su zbunjeni i dovedeni u nedoumicu, jer ne znaju kako im se zove glavna ulica.Na jednoj istoj zgradi, u glavnoj ulici jedna do druge postavljene su dvije table na kojima piše ulica “Alije Izetbegovića” i ulica “Ahmet – Paše Budimlije”.Za rješenje ovoga, ne trebaju velike pare, već malo sluha i dobre volje, pa da znamo koja nam jeste, a koja nije glavna ulica u gradu.

2.Natpis ulica “Gradašćević” u strogom centru grada je išaran je pa se skoro i ne vidi.Ispod natpisa je veliki grafit.Da napomenem, to je ulica čovjeka koji je u Gračanici sagradio medresu, a riječ je o Osmanu-kapetanu Gradašćeviću.Ista ulica je ubjedljivo najgora ne samo u gradu, već na cijeloj općini.Pola ulice je makadam, na šahtovima se nalaze rupe iz kojih izlaze pacovi.Iz obližnjih radnji se na ulicu baca smeće.Ovako kako danas izgleda, ova ulica je bruka grada.

3.Na ulazu u grad s južne strane se nalazi mala i išarana tabla Gračanice i bratskih gradova.Građani predlažu da se ta tabla ukloni, uradi nova, bolja i veća sa grbovima bratskih gradova i da se postavi na više mjesto sa osvjetljenjem.To su zaslužili bratski gradovi”.

### **Alen Ibrišević:**

“Za današnju sjednicu ja imam dvije inicijative:

Prva inicijativa glasi.

Inicijativu upućujem Općinskom načelniku da je proslijedi odgovarajućoj službi, da se uredi putni pojas na asfaltiranim lokalnim putevima kroz MZ Stjepan Polje, te da se izvrši čišćenje kanala koji se nalaze pored lokalnih puteva koji se pružaju kroz MZ Stjepan Polje.

Obrazloženje: Asfaltiranje lokalnih puteva u MZ Stjepan Polje je izvršeno prije 10 godina tj.2007.godine.Od tada pa do danas niti jednom nije izvršeno saniranje putnog pojasa tj.uređenje bankina pored asfaltiranog puta.Usljed vremenskih neprilika s vremenom je došlo do oštećenja bankina te na nekim mjestima došlo je do podravljanja asfaltnog sloja, te će u skorije vrijeme ukoliko se ništa ne poduzme doći do oštećenja asfalta.Tražim od nadležne službe da izdvoji određena sredstva kako bi se izvršio popravak putnog pojasa te da se na taj način produži vijek trajanja asfaltiranih puteva kroz ovu Mjesnu zajednicu.Neposredno prije asfaltiranja te 2007.godine izvršeno je i čišćenje kanala za odvod oborinskih voda koji se protežu duž cijelog puta.Nakon toga kanali više nisu čišćeni te je došlo do začepljenja velikog broja kanala i propusta.Usljed većih kiša dolazi do izlivanja vode na put, što uzrokuje probleme u odvijanju saobraćaja te dolazi do oštećenja puta.Pošto u MZ Stjepan Polje ne postoji uređen sistem kanalizacije, pored odvoda oborinskih voda ovi kanali nerijetko služe i

kao odvodi za fekalne vode te prilikom većih kiša fekalne vode se izljevaju po lokalnim putevima, te nerijetko dolazi do plavljenja objekata koji se nalaze neposredno uz put. Mrežom lokalnih puteva svakodnevno prolaze djeca na putu u školu, te ostalo stanovništvo u obavljanju svakodневnih poslova. Na svu sreću do sada nije bilo nekih značajnih oboljenja i infekcija što ne znači da u buduće do njih neće ni doći. Na osnovu svega navedenog apelujem na nadležnu službu da u saradnji sa Mjesnom zajednicom izvrši čišćenje kanala i uređenje bankina”.

Druga inicijativa glasi:

Inicijativu upućujem Općinskom načelniku da odredi jedan mjesec u 2017. godini, u kojem će se omogućiti besplatna registracija obrta na području općine Gračanica.

Obrazloženje: Općina Gračanica je postala prepoznatljiva u Bosni i Hercegovini kao poduzetnička sredina. Općina Gračanica treba nastaviti trend stvaranja povoljnijeg poslovnog ambijenta. Smatram da bi ova akcija trebala potaknuti neke poduzetne i mlade ljude, da se odvaži i registruju poslovne subjekte i time doprinesu razvoju privrede na teritoriji naše općine. Znamo da su mala i srednja preduzeća motor razvoja uspješnih ekonomija, tako da bi smo i mi trebali samo prepisati ovaj recept uspjeha. Ono što ćemo kratkoročno izgubiti na administrativnim taksama, dugoročno ćemo dobiti kroz poreze i otvaranje novih radnih mjesta”.

### **Avdić Arnes:**

“Ja imam samo jednu inicijativu, a ona glasi:

Vijećnička inicijativa je postavljanje “ležećih policajaca” u MZ Lohinja Donja.

Poštovani,

U razgovoru sa građanima navedene mjesne zajednice došli smo do zaključka da je neophodno postavljanje “ležećih policajaca” na potezu od glavne saobraćajnice pored “ARNIXA” pa u dužini nekih 500 metara. Na ovom potezu je neophodno neka 3-4 “ležeća policajca”. U ovom naseljenom mjestu je veliki broj djece, a samim time i školska godina je završena pa je sve veći broj djece na cesti. Vozači koji skrenu u ovu ulicu sa glavne ceste nemaju osjećaj za brzinu pa je i opasnost za djecu veoma velika. Molim nadležnu službu da reaguje u što kraćem vremenskom roku kako nebi došlo do neželjenih posljedica koje svakako ne želimo ni jedni ni drugi”.

### **Edin Šehić:**

“Ja imam jedno vijećničko pitanje i jednu vijećničku inicijativu.

Vijećničko pitanje se odnosi na sljedeće. Zašto se kasni sa određenim materijalima usvojenim po Programu rada O.V. za 2017. godinu.

Upućujem vijećničko pitanje, zašto se kasni sa određenim materijalima usvojenim po Programu rada Općinskog vijeća. Obrazloženje: Općinsko vijeće Gračanica usvojilo je program rada za 2017. godinu, po kojem su između ostalih planirane sljedeće teme i materijali za diskusiju po mjesecima:

1. Strategija za mlade Općine Gračanica – mart 2017.
2. Informacija o radu Vijeća MZ općine Gračanica u 2016. godini – mart 2017. Ona je na dnevnom redu i dosta je štura.
3. Informacija o statusu vodovoda u MZ (broj priključaka, potrošnja vode, godišnji prihodi i rashodi) – maj 2017.
4. Informacija o stanju i statusu nepokretne imovine u MZ (broj objekata izdatih pod zakup, godišnji prihod od zakupa i utrošak tih sredstava) – juni 2017. I ona se ne nalazi na današnjoj sjednici. U prilogu je i Program rada Općinskog vijeća sa označenim tačkama koje nisu razmatrane.

Vijećnička inicijativa se upućuje načelniku i nadležnim službama za uvođenje rada šalter sale poslije 16 sati, kao i omogućavanje kopiranja osnovnih dokumenata za ovjeru.

Upućujem vijećničku inicijativu za uvođenje rada šalter sale poslije 16 sati, kako bi se omogućilo izdavanje osnovnih dokumenata (Uvjerenje o državljanstvu, Izvod iz matične knjige rođenih, Izvod iz matične knjige umrlih, Izvod iz matične knjige vjenčanih i drugi dokumenti koje izdaju općinske službe), kao i ovjera osnovnih dokumenata (Lična karta, CIPS, itd.).Potrebno je takođe omogućiti kopiranje osnovnih dokumenata u krugu općine (besplatno ili po tržišnoj cijeni).

Obrazloženje:

Svjedoci smo da većina građana/uposlenika sa područja naše općine radi u vremenu do 16 sati, čime nailaze na problem korištenja usluga općinskih službi u pogledu izdavanja i ovjere određenih dokumenata, obzirom da šalter sala radi do 16 sati. Takođe, vrlo često građani budu primorani da određene dokumente moraju kopirati u najbližoj kopirnici, udaljenoj preko 300 metara, što je prvenstveno poteškoća za starije, ali i one koji žure na posao.Obično se tu radi o kopiji lične karte, CIPS-a, čije originale posjeduju!

Općina je servis građana i s tim u vezi vijećnička inicijativa treba da dobije podršku izvršne vlasti općine Gračanica da pronade način da istu implementira, kako u pogledu prilagođavanja radnog vremena šalter sale, tako i omogućavanja kopiranja osnovnih dokumenata u krugu općine, dali po tržišnoj cijeni (max 0,10 KM/stranici ili besplatno). Poređenja radi, kopiranje lične karte, CIPS-a, Izvoda iz matične knjige rođenih, Uvjerenja o državljanstvu, tržišno košta max 0,50 KM, a za takvu uslugu treba preći preko 600 metara i gubiti dragocjeno vrijeme, a naravno i stvara nervoza kod građana”.

### **Almedin Devedžić:**

“Ja imam jednu inicijativu koju upućujem Veterinarskoj stanici Gračanica, odnosno direktoru gospodinu Zaimu Spahiću. Nakon uspješno provedene akcije čišćenja divlje deponije u naselju Ograđenica u čijem samom centru se nalazila Veterinarska stanica, bivša Veterinarska stanica koja nije u funkciji i stvorili su se uslovi daljih aktivnosti na tom polju.I stim u vezi pokrećem inicijativu upućenu direktoru Veterinarske stanice. Znači, inicijativa za rekonstrukciju Veterinarske stanice u MZ Lukavica pokrećem inicijativu prema direktoru Veterinarske stanice da pokrene aktivnosti oko rekonstrukcije Veterinarske stanice u MZ Lukavica.

Obrazloženje: Mjesna zajednica Lukavica je izrazito poljoprivredni kraj u kojem se stanovnici najviše bave zemljoradnjom i stočarstvom. S tim u vezi postoji opravdana potreba za ponovnim osposobljavanjem zgrade Veterinarske stanice koja je u ratu ali i poslije devastirana i od koje su ostali zidovi i krov. Objekat je napušten i oko njega je u prethodnim godinama stvorena divlja deponija smeća. Deponiju smeća smo sanirali nakon čega su se stvorili uslovi za rekonstrukciju objekta. Obzirom da je u sklopu Veterinarske stanice Gračanica zaposlen doktor veterine koji je trajno nastanjen u Lukavici, otvorena je mogućnost oživljavanja Veterinarske stanice u Lukavici. Pozivam direktora da pokrene aktivnosti kako bi se u najskorijem vremenu krenulo u sanaciju krova i stolarije pomenutog objekta kako bi stanovnici Lukavice ali i ostalih okolnih mjesta imali konstantnu i kvalitetnu veterinarsku uslugu kao što su to nekada imali. Napominjem da pomenuti objekat ima sve vodovodne i elektro priključke koje treba samo staviti u funkciju”.

### **Vahidin Smajlović, u ime Kluba vijećnika SDP-a kandidovao je slijedeće:**

“U ime Kluba vijećnika SDP-a imam jednu inicijativu koja je upućena Policijskoj upravi Gračanica. Inicijativa se odnosi na to da zabrani vožnju bicikla kroz centralnu ulicu u gradu. Povod za ovu inicijativu dobili smo od građana koji se žale na prisustvo i vožnju bicikla velikim brzinama naročito u popodnevnim i večernjim satima, pa može doći do nesreća i povreda, pa zbog toga i upućujemo ovu inicijativu”.

### **Edin Šehić se javio za diskusiju:**

“Obzirom, da sam čuo, da je neko dobacio, neka, ponese sa sobom kopiju sa sobom. Samo da kažem o čemu se tu radi. Kada dođe neko nema i treba da ovjeri svoju ličnu, ona donese original. Ona ne zna da joj treba kopija. I zamislite sad da ona ide da kopira i pređe 300 metara. Tako isto kada izvadite neki originalan dokument i trebate ga odmah kopirati, morate otići 300 metara da to uradite. Znači oni koji znaju, oni će svakako ponijeti kopiju, tako da ovo gorovim jer sam čuo komentar, neka ponese kopiju. Naravno da će to uraditi oni koji znaju, a onaj koji ne zna, nije fer da ide po kopiju 300 metara”.

### **Nihad Krajinović:**

“Upućujem inicijativu za sanaciju kanalizacije u naselju Čiriš, iza skladišta preduzeća Bosna. Obrazloženje: Obzirom da se o sličnom problemu govorilo na posljednjoj sjednici Vijeća u dijelu grada kod obdaništa, upućujem inicijativu za rješavanje problema izlivanja kanalizacije, a prema saznanjima od građana da je ovo višegodišnji problem.

Naime, između stambenih objekata i skladišnog prostora preduzeća “Bosna” u blizini autobuske stanice u Gračanici nalazi se otvorena kanalizacija iz koje se izljevaju fekalije. Građani su svjesni da je pored izgrađenih objekata teško izvršiti sanaciju ali mole, tj. traže da se ovaj problem riješi.

Problem je nesnošljiv miris fekalija, mogući izvor zaraze kao i izgled okoliša. Već sam rekao da se o sličnim problemima govorilo i da se odgovorni za rješenje problema nalaze na terenu, molim da se pronalazak rješenja proširi i na ovu lokaciju”.

### **Obzirom da nije bilo više prijavljenih članova Vijeća za postavljanje pitanja i inicijativa, za govornicu je izašao Općinski načelnik Nusret Helić i dao odgovor na neka pitanja i inicijative:**

“Da damo odgovore na neka pitanja i inicijative, da se ne dopisujemo. Evo prvo na inicijativu Čamdžića, ovo treba uputiti preko Vijeća, ili preko službi, prema Vladi Kantona. Mi možemo dati podatke šta smo dobili para i iz kojeg fonda. A koji su kriteriji, kako kojoj opštini su dodjeljivana sredstva možemo pribavljati i da to uputimo samo tamo, da oni to rade. Ima ovo i sve je tačno, različiti su aršini, ali neka oni kažu po kojim kriterijima dobivaju opštine itd. Jesam i ja zainteresovan, da ne pričam sad ovdje, svaki dan se svađam s njima ali oni kažu, to je tako. Mešić, za kanalizaciju, ljudi su dobili posao, Gramat, započeo je i počeo ugrađivati materijale koji nisu u tenderu. Obustavljen je i juče mu je dat nalog. Krajnji rok je 20. juli da se stavi u funkciju i oborinska i fekalna kanalizacija. Juče je bio tu, obećanje je dato ako ne, sleduju oni penali, da će biti to završeno do 20. jula. Iza toga mi tražimo mogućnost obezbjeđenja sredstava da se asvaltira, to sve što se uradi tako da znamo za problem Roma i da jedva čekaju, ali evo to je razlog zašto se do sada nije završilo. Oko ovih usporivača, evo često se iznosi. Ja sam iznosio svoj stav, mi ćemo odgovoriti. Ja sam protiv bilo kakvih usporivača na cestu koja nije asvaltirana. Da ostavimo makadam i sjeći ćemo kanale, usporivači nisu rješenje, rješenje je kod onog ko je odgovoran za brzinu. Uredu, postaviti znakove o odgovarajućoj brzini i da to provodi onaj ko je nadležan. Bilo je i tužbi zbog usporivača koji su negdje stavljeni, tako da je to osjetljivo pitanje. Osjetljivo i radi štete na vozilu. Ali evo, mi ćemo dati odgovor i imamo odgovor koliko košta jedan kvalitetan usporivač i obezbijedite pare prilikom usvajanja budžeta i imat ćemo ih. Evo ovo je ujedno i sugestija dajte kod utvrđivanja budžeta da malo tu budžetsku rezervu utrdimo veću. Nije džabe rečeno da treba 3 %. Sve ovo što ste rekli imamo projekte.

Mešić, ja mogu odgovoriti, nema u budžetu para. To se radi iz budžetske rezerve. Tako da možemo puno toga riješiti, a mi obično mislimo da budžetsku rezervu troši načelnik za neke tamo. Evo ja sam samo pokušao odgovoriti na ova tri, inicijativa ide gore prema Vladi. Mešić, evo to je oko procedure, a za inicijativu Arnesa, evo odgovorit ćemo, oni se mogu

raditi ali i za to ima procedura, odgovarajuća odobrenja, sredstva i slično. A za normalnog čovjeka dovoljan je znak, a najbolja mjera je kazna, što se i pokazalo u praksi. Odgovorit ćemo mi na inicijativu”.

**Mirsad Čamdžić:**

“Zahvaljujem načelniku, ja sam smatrao da ukoliko pošaljemo ne jedan vijećnik, nego Općinsko vijeće Gračanica, da to ima veću snagu u kantonu. Dakle, da ovo bude, nakon izjašnjavanja, inicijativa Općinskog vijeća Gračanica, a ne inicijativa pojedinca, kako bi nas ozbiljnije shvatili. Samo to”.

Predsjedavajući Vijeća je dao riječ Gadžić Rahimu, prije izjašnjavanja o inicijativi.

**Gadžić Rahim:**

“Ja bih prije izjašnjavanja oko ove inicijative, da se malo provede rasprava - Zašto? da vidimo konkretno šta ćemo mi tražiti od toga. Ima toga prije niz godina što se dešavalo ovako što se tiče sredstava iz kantona. Da kažemo koji period, jeli mi tražimo samo za 2016. godinu ili za više godina, šta se dešavalo, da znamo šta hoćemo, koje podatke. Zbog toga mislim da bi možda, ukoliko se Mirso složi da Kolegij napravi jedan akt, šta mi to tražimo sve. Imamo mi fondova više i ne znamo odakle sve sredstva dolaze u sve opštine. Meni je drago što će ta inicijativa ići, ali možda istu treba uputiti i prema Federalnoj Vladi. Ali moramo je precizirati, šta hoćemo i na koji način? Ima dosta toga što treba precizirati”.

Predsjedavajući Vijeća je naglasio da je Čamdžić precizirao, da su to sredstva što odobrava Vlada.

**Puškar Hasan:**

“Ja bih da se u tu inicijativu uvrsti i sredstva koja je Vlada odobrila, a Općina nije iskoristila odnosno nije ispoštovala proceduru u proteklim godinama. Da se i to uvrsti u inicijativu pa da i to bude u izvještaju”.

**Avdić Arnes:**

“Kad smo već otvorili raspravu, moje se odnosi ovdje, na ispravak krivog navoda, u kolege Mirsada Čamdžića je navedeno, da je Direkcija cesta u 2016. godini uputila 350.000 KM, prema mojim podacima do kojih sam došao uputila je 854.772,80. Samo ispravka”.

**Mirsad Čamdžić:**

“Rekao sam da je teško formulirati i slažem se sa vašim svim nedoumicama oko ovog. Broj jedan, precizno rečeno da se u posljednje tri budžetske godine izvrši analiza raspodjele prihoda od strane Vlade TK. Naravno da i direkcije podpadaju pod Vladu. Znači samo tri godine 2015, 2016 i 2017. godine.

Drugo, za kolegu Arnesa, ja sam rekao ova informacija je sa kojom ja raspolažem, a vama predstavljam, što može biti tačno. I naš cilj i jeste, da neko iz Direkcije kaže, ne nisu Banovići nikako dobili, million ili dva, to što govorite, nije tačno, oni su dobili 300.000, a Gračanica je dobila million i dvjesto. Mi od njih tražimo te podatke. Naravno, puno je i fondova i teško je tražiti to od fondova, a ovo se odnosi samo na stvar koja je javna i mislim da se to može pokupiti sve na internet stranici ako su oni postavili kako se distribuiraju sredstva prema opštinama od strane Vlade TK. Eto, to je to”.



## **Predsjedavajući Vijeća je dao pauzu, za sastanak Kolegija.**

Nakon pauze iznio je sljedeće:

“Kolegij je usaglasio ovakav stav. Kolegij Općinskog vijeća će uz pomoć nadležne službe sačiniti i usaglasiti sadržaj pitanja, to jest, tražene informacije za Vladu TK, te na narednoj sjednici uputiti Vijeću na usvajanje i takvu proslijediti, naravno ukoliko bude usvojena, Vladi TK”.

Zaključak Kolegija je usvojen jednoglasno.

Prešlo se na raspravu o predloženom dnevnom redu koji glasi:

### **DNEVNI RED :**

1. NACRT ODLUKE O USVAJANJU I PROVOĐENJU IZMJENA I DOPUNA REGULACIONOG PLANA „RADNA ZONA I, II i I-1 FAZA ISTOK“
2. ODLUKA O IZMJENAMA I DOPUNAMA ODLUKE O UTVRĐIVANJU USLOVA, KRITERIJA I POSTUPKA DODJELE STIPENDIJA UČENICIMA SREDNJIH ŠKOLA I STUDENTIMA.
3. ODLUKA O BROJU I VISINI STIPENDIJA UČENICIMA SREDNJIH ŠKOLA I STUDENTIMA ZA ŠKOLSKU 2017/2018.GODINU.
4. ODLUKA O IZMJENAMA ODLUKE O JAVNIM PARKIRALIŠTIMA NA PODRUČJU OPĆINE GRAČANICA.
5. RJEŠENJE O IMENOVANJU ČLANOVA NADZORNOG ODBORA JP “VETERINARSKA STANICA” GRAČANICA.
6. SAGLASNOST NA ODLUKU O IZMJENAMA STATUTA JP “KOMUS” D.O.O. GRAČANICA.
7. IZVJEŠTAJ O IMPLEMENTACIJI PROJEKATA PO JAVNOM POZIVU ZA NEVLADIN SEKTOR OBJAVLJENOM U 2016.GODINI.
8. INFORMACIJA O AKTUELNIM PRIVREDNIM KRETANJIMA NA OPĆINI GRAČANICA U 2016.GODINI.
9. INFORMACIJA O STANJU PUTNE INFRASTRUKTURE NA PODRUČJU OPĆINE GRAČANICA.
10. INFORMACIJA O RADU VIJEĆA MJESNIH ZAJEDNICA OPĆINE GRAČANICA U 2016.GODINI.
11. RADNA VERZIJA ZAKONA O DOPUNAMA ZAKONA O POREZU NA PROMET NEPOKRETNOSTI.

Učesnici u diskusiji su:

### **Vahidin Smajlović:**

“Vezano za dnevni red, u ime Kluba SDP-a mi predlažemo da se tačka 10 predloženog dnevnog reda Informacija o radu Vijeća MZ Općine Gračanica u 2016.godini skine sa dnevnog reda danas, uz obrazloženje zato što je materijal-informacija, nekompletan. Znači od ukupno 23 MZ, dobili smo Izvještaj samo za 11 mjesnih zajednica. Mislim da je sasvim opravdano da se ova tačka povuče sa dnevnog reda uz naš prijedlog. Obzirom da nemamo komisije za MZ, da se kompletan Kolegij Općinskog vijeća uključi vezano za ovo oko pitanja, dio prikupljanja informacija koje se traže i izradi kvalitetne Informacije koja treba da dođe ovdje na Opštinsko vijeće. Tako na taj način da pokušamo kompetirati Izvještaj o radu Vijeća

MZ. A da možda već u septembru ili oktobru da se dogovori termin i da se zakaže jedna tematska sjednica vezano za rad MZ općine Gračanica”.

**Rahim Gadžić:**

“Evo ako već predlažu skidanje ove tačke dnevnog reda, ja bih prije iako se Vijeće opredijeli da se ova tačka skine s dnevnog reda, u susret ovom zaključku, prvo da vidimo tehničku opremljenost MZ, dali su tehnički opremljene da mogu dati sve podatke za službu kako bi se informacija uradila. Da li imaju adekvatnu opremljenost kancelarija. I mi smo prije par godina obilazili sve mjesne zajednice da vidimo u kakvom su stanju svi prostori MZ i znamo da su mnoge MZ preko projekata preko UNDP-a uspjeli da opreme te prostore, dobili su određena sredstva za to. Neke nisu, neke imaju prostor a neke nemaju nikako. Pa već ako ćemo pripremati informaciju za neku narednu sjednicu, da tu informaciju dopunimo sa tim podacima, da znamo, šta ima koja MZ, s čime raspolaže koja MZ i šta nema, kako bi smo eventualno planirali to kroz naredne budžetske općine. Da pokušamo to dovesti u neki red, kako i bar svaka MZ imala jednu kancelariju gdje se može posjetiti, doći u tu MZ. I Građani i predsjedavajući, a i ta komisija koja će biti za MZ u narednom periodu. Tako bi bili puno bolje i informacioni a i MZ bi kvalitetnije radile”.

**Edin Šehić:**

“Evo ja bih da dopunim ovo izlaganje kolege Vahidina i Gadžića. Dakle, zaista nam je potrebna jedna tematska sjednica Općinskog vijeća. Većina vas je bila na dva sastanka kojeg je organizirao UNDP-i, jačanje uloga MZ, dakle zaista nam je potrebna jedna sveobuhvatna analiza na terenu. I predlažem, obzirom da sam već uputio inicijativu, odnosno vijećničko pitanje za određene informacije koje su planirane u Programu rada Općinskog vijeća, da se te takođe informacije traže od Vijeća MZ kako bi snimanjem terena u svim MZ, ovo sve što je i Rahim rekao i Vahidin, došli do određenih zaključaka, sve sa ciljem jačanja MZ, njihove uloge, jer to će nam zasigurno tražiti i Evropski standardi. Mislim da smo na dobrom putu i treba nam ta tematska sjednica”.

**Sulejmanović Osman:**

“Čini mi se da je naš cilj, Klub SDP-a i bio da se pokupe ove informacije. Kolegij je sastavljen od predstavnika svih stranaka i čini se da su oni najrelevantniji da pokupe te podatke, da pomognu Vijeću MZ da se ti podaci prikupe. I kad budemo imali te podatke, onda možemo raspravljati i da ta informacija služi za kreiranje narednih budžeta”.

**Džemal Jukan:**

“Evo svi pokušavamo dati doprinos kako da dođemo do kvalitetnih informacija. Ja bih predložio. Obzirom da po našem Statutu i Poslovniku predsjedavajućeg je između ostalog osnovna djelatnost, zadužen je da prati rad Vijeća MZ koordinira itd. Evo, ne znam vrijeme je godišnjih odmora, dali će se Kolegij sastajati, hoćemo li imati vremena iznijeti prijedloge. U opisu radnog mjesta predsjedavajućeg, treba sa saradnicima, a saradnici smo mi i hoćemo li dati koga da obiđe MZ, na terenu i da da uputstva kako će dostaviti podatke, šta će dostaviti i da im predoče neke stvari kud to idemo, šta hoćemo, šta radimo i kako unaprijediti sve to. Mislim da je to put da bi došli do kvalitetne informacije i onda donositi neke zaključke, smjernice itd.”.

Predsjedavajući Vijeća je dao na izjašnjavanje prijedlog Kluba SDP-a za skidanje tačke 10 s dnevnog reda uz prijedloge koji su iznešeni u toku rasprave.

Prijedlog je usvojen jednoglasno.

Nakon toga dat je na izjašnjavanje prijedlog dnevnog reda 9.sjednice bez tačke 10, koji je takođe usvojen jednoglasno, kako slijedi:

1. NACRT ODLUKE O USVAJANJU I PROVOĐENJU IZMJENA I DOPUNA REGULACIONOG PLANA „RADNA ZONA I, II i I-1 FAZA ISTOK“
2. ODLUKA O IZMJENAMA I DOPUNAMA ODLUKE O UTVRĐIVANJU USLOVA, KRITERIJA I POSTUPKA DODJELE STIPENDIJA UČENICIMA SREDNJIH ŠKOLA I STUDENTIMA.
3. ODLUKA O BROJU I VISINI STIPENDIJA UČENICIMA SREDNJIH ŠKOLA I STUDENTIMA ZA ŠKOLSKU 2017/2018.GODINU.
4. ODLUKA O IZMJENAMA ODLUKE O JAVNIM PARKIRALIŠTIMA NA PODRUČJU OPĆINE GRAČANICA.
5. RJEŠENJE O IMENOVANJU ČLANOVA NADZORNOG ODBORA JP “VETERINARSKA STANICA” GRAČANICA.
6. SAGLASNOST NA ODLUKU O IZMJENAMA STATUTA JP “KOMUS” D.O.O. GRAČANICA.
7. IZVJEŠTAJ O IMPLEMENTACIJI PROJEKATA PO JAVNOM POZIVU ZA NEVLADIN SEKTOR OBJAVLJENOM U 2016.GODINI.
8. INFORMACIJA O AKTUELNIM PRIVREDNIM KRETANJIMA NA OPĆINI GRAČANICA U 2016.GODINI.
9. INFORMACIJA O STANJU PUTNE INFRASTRUKTURE NA PODRUČJU OPĆINE GRAČANICA.
10. RADNA VERZIJA ZAKONA O DOPUNAMA ZAKONA O POREZU NA PROMET NEPOKRETNOSTI.

Prešlo se na rad po dnevnom redu.

## **TAČKA 1 NACRT ODLUKE O USVAJANJU I PROVOĐENJU IZMJENA I DOPUNA REGULACIONOG PLANA „RADNA ZONA I, II i I-1 FAZA ISTOK“**

Uvodno obrazloženje dala je Aida Hodžić, šef Službe za upravu:

Naslov dokumenta koji razmatramo je Odluka o usvajanju i provođenju izmjena i dopuna Regulacionog plana radna zona I, II i III Gračanica – Prva faza Istok. Prilikom štampanja došlo je do greške, dakle radi se o izmjenama i dopunama, sve ostalo ostaje isto i u samom tekstu je isto napisano. S nama je u sali prisutan i nosilac izrade planskog dokumenta predstavnik Sunita Opitc koja će u slučaju potrebe moći dati određena objašnjenja.

Danas imamo pred sobom nacrt, dakle svaki planski dokument ima svoje faze izrade, izrada prednacrta, nacrt i na kraju izrada prijedloga plana. Danas imamo pred sobom nacrt. Nosilac izrade planskog dokumenta je “Tehnobiro” d.o.o. On je izabran od strane investitora kojima smo našom Odlukom Općinskog vijeća povjerili da isfinansira izradu i dopunu ovog planskog dokumenta. Prednacrt je razmatran zajedno sa službom i Komisijom za urbanizam i ekologiju 14.6.2017.godine. Tad je uz neke sugestije i prihvaćen. Poslije toga je službi dostavljen nacrt dokumenta iz koga je iskopirana Odluka, tekstualni dio sadržaja i karte sinteznog prikaza izmjena i dopuna regulacionog plana. Još da napomenem, nama su od 2007.godine za ovaj plan povlači ovaj dugački naziv koji na žalost nije moguće izmijeniti. Regulacioni plan Radna zona I, II, III a to se ustvari radi o Radnoj zoni I. Mi ga tako

zovemo, a ove ostale zovemo radna zona II i III. Samo da se zna da nebi bilo zabrane. Evo to je to, a ako ima pitanja tu smo da odgovorimo”.

Učesnici u diskusiji po ovoj tački dnevnog reda su:

**Safet Pjanić:**

“Mi smo na Klubu SDA raspravljali ovu Odluku i mislimo da je ovo jedan vrlo važan dokument za našu opštinu, pogotovo što reče Aida, radi se o Radnoj zoni I gdje je odprilike dalo mogućnost ukupljavanja posjeda na tom prostoru. Došlo je do izmjene vlasništva i ljudi koji su tu, inicirali su izradu plana i ovo je jednostavno razvojna šansa da se razvija i opština a i da se pomogne poslodavcima koji tu žele ulagati, tako da oko ovog nebi trebalo biti mnogo polemike”.

**Sulejmanović Osman:**

“I mi na Klubu SDP-a smo razmatrali ovu Odluku odnosno nacrt Odluke. Posebno pozdravljamo način izrade plana, odnosno pristupanja izradi, jer su ovo odprilike i želje vlasnika parcela, koliko smo mi bili informisani. U odnosu do sad kako je rađeno, znači radi se plan, na parceli toj i toj predviđeno je to i to, neovisno o želji vlasnika. Klub SDP-a podržava, ali ja lično imam 2-3 zamjerke. Ustvari ne znam kolika je nivelaciona kota, ovih objekata jeli rađena u skladu sa plavnim područjem, brane Modrac? To jedno i moje drugo pitanje su ove ograde, kaže “predviđene su ograde visine 2,00 metra zelene boje”. Nije sad ovo što smo mi crveni, nego, što baš zelene boje? Govorim to, jer je definisano i jeli se mora definisati boja? I ova udaljenost objekta 2,00 metra, ja mislim da bi ovdje trebali dodati, da može i manja udaljenost uz saglasnost vlasnika objekata. I predložio bih još ukoliko postoji mogućnost, da se planira, a ja sam na Klubu predlagao, da se pokuša jedna saobraćajnica provući od tržnog centra Robot, tamo prema Pribavi. Ako nije moguće, onda da se bar proba ostaviti prostor za jednu dobru pješačku zonu. Sad ima trotoar, uzak, mislim da bi trebalo i saobraćajnica, ali ako ništa, onda bar jednu dobru pješačku zonu. I postoji li mogućnost proširenja prema jugu. Znači, uz put Doboj-Tuzla, samo tamo uz put, jer su provučene saobraćajnice. Tamo stoji da ima i druga strana saobraćajnica, jednostavno da bi smanjili cijenu saobraćajnice, da imamo ulaganja i da se znači i s druge strane dopusti gradnja”.

Predsjedavajući Vijeća je definisao zaključak, da se prihvata Nacrt Odluke o usvajanju i provođenju izmjena i dopuna regulacionog plana “Radna zona I, II i I-1 faza Istok” uz stav da javna rasprava traje 45 dana.

Zaključak je usvojen jednoglasno.

**TAČKA 2**

**ODLUKA O IZMJENAMA I DOPUNAMA ODLUKE O UTVRĐIVANJU USLOVA, KRITERIJA I POSTUPKA DODJELE STIPENDIJA UČENICIMA SREDNJIH ŠKOLA I STUDENTIMA.**

Nije bilo dodatnog obrazloženja od strane predlagača.

**Almedin Devedžić je iznio stav Komisije za obrazovanje:**

„Mi smo se sastali i raspravljali Odluku o izmjenama i dopunama odluke o utvrđivanju uslova, kriterija i postupka dodjele stipendija učenicima srednjih škola i studentima i Odluku o broju i visini stipendija učenicima srednjih škola i studentima za školsku 2017/2018. godinu. Komisija je zadovoljna sa ovim prijedlozima i pohvaljuje rad predlagača. Drago nam je što su se problemi iz prakse, dosadašnje, koji su se pojavljivali,

ubacivanjem određenih izmjena tipa da se uvaži invaliditet ispod 50 %, zatim takmičenja itd., da ne čitam dalje jer imate u materijalu. Dakle, Komisija za obrazovanje se slaže sa ovim odlukama“.

### **Hasan Puškar je iznio stav Komisije za propise i Statut:**

„Pohvaljujem službu što smo napokon dobili u prilogu čitavu Odluku, pa razrađene članove fino jedan po jedan, koji se mijenjaju. Komisija je imala primjedbu na član 1. Odluke koji glasi: Pravo na stipendiju za učenike generacije osnovnih i srednjih škola imaju svi učenici generacije sa prebivalištem na području općine Gračanica, a koji su završili škole na području općine Gračanica. Komisija je zauzela stav da se u članu 1, a kojim se mijenja član 4. Odluke briše tekst: „a koji su završili škole na području općine Gračanica“ iz razloga što postoje učenici sa prebivalištem na općini Gračanica, a učenici su škola koje nisu na području općine Gračanica (npr. Geodetska, Veterinarska i slično.). Eto to mi predlažemo da se prihvati“.

Predsjedavajući Vijeća je konstatovao da predlagač prihvata primjedbu Komisije za propise.

Učesnici u diskusiji su:

#### **Almedin Devedžić:**

„Evo ja ću u ime Kluba SDA izraziti stav, da se Klub slaže sa ovom Odlukom i prihvata je u potpunosti“.

#### **Vahid Bajrić:**

„Klub SDP-a će podržati ovu Odluku, uz dopunu člana 13, pravo na stipendije za učenike i studente iz porodica kojima su srušeni objekti od poplava i klizišta nisu stambeno zbrinuti, imaju učenici i studenti prijavljeni na konkurs za stipendije uz zahtjev prilažu samo dokaz o državljanstvu, gdje Klub predlaže da se doda i da imaju prebivalište na općini Gračanica. To nije uvršteno ovdje“.

Predlagač je prihvatio prijedlog nakon čega je Odluka o izmjenama i dopunama Odluke o utvrđivanju uslova, kriterija i postupka dodjele stipendija učenicima srednjih škola i studentima usvojena jednoglasno.

### **TAČKA 3**

#### **ODLUKA O BROJU I VISINI STIPENDIJA UČENICIMA SREDNJIH ŠKOLA I STUDENTIMA ZA ŠKOLSKU 2017/2018. GODINU.**

Nije bilo dodatnog obrazloženja, a u diskusiji po ovoj tački dnevnog reda učestvovali su:

#### **Demir Milkić:**

“Evo ja bih imao jedno pitanje. Član 2. stav 2, djeci iz porodica šehida i poginulih boraca 10 stipendija, učenici 1 razreda 1 stipendija, a učenicima II, III i IV razreda po 1 stipendija, pitanje je pošto su te generacije izašle, šta se pod tim podrazumijeva? I meni lično što sam među omladinom čuo da se pokušaju malo rokovi pomjeriti, oko raspisivanja konkursa a i same uplate stipendije kad se odobri kasni se sa isplatom. Znači molio bih ako kaže da se prva stipendija uplati odmah u oktobru radi studentskih troškova”.

### **Arnes Avdić:**

“U ime Kluba BPS-a imam prijedlog na izmjenu člana 4, samo da se na kraju doda “a za učenike generacije 900 KM”. Budući da je učenik generacije na neki način, da ih odvojimo od ovih za stipendije srednjih škola, pa da i to dobiju. To je još 14 pomnoženo i sa razlikom još nekih 300 KM, po stipendiji 4.200 KM i mislim da nije puno za budžet. A da na neki način stimuliramo učenike generacije”.

### **Alihodžić Nermina:**

“Klub SDA je razmatrao Odluku o broju i visini stipendija učenicima srednjih škola i studentima za školsku 2017/2018. godinu i mi ćemo podržati ovu Odluku. Ja bih da iskoristim priliku, da se zahvalim načelniku na uvaženoj mojoj inicijativi od prošle godine, za tekuću 2016/2017. godinu na dodjeli stipendije kategoriji učenika slabog imovinskog stanja”.

### **Krajinović Nihad:**

“Obzirom da smo u predhodnoj Odluci, dakle dio rečenice u dodjeli stipendija učenicima sa područja općine Gračanica, a koji nisu završili školu na području općine Gračanica, to smo izbacili, što znači da mogu to ostvariti i učenici koji su završili školu i u Lukavcu, u Doboj Istoku i u Srebreniku, šta ćemo ako nam se desi evo ovdje u članu 2 pod 1 učenicima generacije 14 stipendija, ako nam se taj broj poveća sa dolaskom tih učenika iz Srebrenika, Doboj Istoka i Lukavca. Ili još neke druge škole, šta ćemo, samo da se pojasni, povećat će se broj učenika?”

### **Obrazloženje i odgovore dala je Alma Buljubašić, šef Službe za upravu:**

“Da odgovorim na pitanje vijećnika Demira Milkića. Sjećate se, mislim da je to bilo u martu mjesecu, kad su se dodjeljivale stipendije, kad je bila lista i izvještaj o stipendijama, isto je bilo pitanje vezano za šehidske porodice. Znači lica koja su bila u kategoriji RVI-a i koji su u međuvremenu umrli od posledica ranjavanja, automatski su prešli u kategoriju poginulih boraca, jer njihove porodice moraju na neki način, ostvarivati ta prava koja im pripadaju. Da ne bude zabune, to nisu djeca koja su rođena u nekim novim brakovima osoba, hudovica koje su ostale iza svojih muževa. To su djeca koja su rođena u braku gdje je RVI, 100 % bio živ ali je umro od posledica ranjavanja i ta djeca su izjednačena u svim pravima sa šehidskom djecom”.

### **Osman Sulejmanović:**

“Ja mislim da ovo možemo sad prihvatiti, ali za narednu godinu mislim da bi trebalo ubaciti stavku i da tu stoji “djeca umrlih boraca i invalida”. Da se zna da su to ti”.

### **Na prijedlog Arnesa, kratko obrazloženje je dao Općinski načelnik Nusret Helić:**

“Vi ćete se izjašnjavati o prijedlogu Arnesa Avdića, ali nije u redu da izdvajamo bilo koga i da neki dobivaju veće stipendije, a neki manje. Učenici generacije dobiju, posebnu novčanu nagradu, za što su učenici generacije, zatim posebno priznanje za to. A u daljem školovanju bi trebali biti svi isti, eto u tom smislu. Puno njih konkuriše za učenika generacije a vrlo male nijanse su ko će biti učenik generacije. Nisam za to da se izdvajaju visinom stipendije”.

Na prijedlog Hasana Puškara ispred Kluba SDA data je pauza u trajanju od deset minuta.

Nakon pauze predsjedavajući Vijeća je dao prijedlog Arnesa Avdića na izjašnjavanje, o povećanju stipendije za učenike generacije.

“ZA” prijedlog je glasalo 8 članova vijeća, a 16 je “SUZDRŽANO”.

Prijedlog nije usvojen.

Odluka o broju i visini stipendija učenicima srednjih škola i studentima za školsku 2017/2018.godinu je usvojena sa 22 glasa “ZA” i 2 “SUZDRŽANO”.

#### **TAČKA 4**

#### **ODLUKA O IZMJENAMA ODLUKE O JAVNIM PARKIRALIŠTIMA NA PODRUČJU OPĆINE GRAČANICA**

**Hasan Puškar je iznio stav komisije za propise i Statut na prijedlog Odluke o izmjenama i dopunama Odluke o javnim parkiralištima na području općine Gračanica:**

„Komisija za propise je ovu Odluku razmatrala na 13 sjednici i tom prilikom ulažemo amandman na član 1.

U Odluci o javnim parkiralištima na području općine Gračanica, član 8. stav 1. mijenja se i glasi.Na javnim parkiralištima na kojima se naplaćuje parkiranje, radno vrijeme će biti određeno kako slijedi: Radnim danima u ljetnom periodu od 01.05. do 30.09. utvrđuje se radno vrijeme od 06,00 do 20,00 sati, a u ovoj Odluci je od 06. do 18 sati.Dalje, u zimskom periodu od 1.10. do 30.04. utvrđuje se radno vrijeme od 06 do 18 sati. Subotom tokom cijele godine u periodu od 06,00 do 13,00 sati samo na parkiralištima nulte zone.To je znači oko centra grada. Komisija predlaže da se u članu 7. stav 1. Odluke u tabeli pod tačkom 9 PKSC, to je parkiralište kod Bazena u oznaci zone tekst: Sezona I zona zamijeni riječima „po posebnoj Odluci“.Trenutno se tamo naplaćuje parkiralište, niti se zna ko naplaćuje ni kad, ni koliko.Znači, da se tu može parkiralište naplaćivati samo u slučaju kad Odlukom Općina ili Općinski načelnik proglasi parkiralište u dane vašera ili nekad u posebnim prilikama i kad se tu odredi parkiralište samo se tada naplaćuje, dok se drukčije ne definiše. Podvlačim, trenutno imamo primjedbe građana da tamo neka lica naplaćuju parkinge a mi ne znamo tačno ni u koje vrijeme, ni po kojoj odluci.Toliko“.

Učesnici u diskusiji su:

#### **Ibrahim Hasić:**

„U ime Kluba SDP-a, znači Klub vijećnika SDP-a je razmatrao ovaj prijedlog Odluke sa određenim izmjenama i kao takvu prihvata, sem što bi od 06,00 do 18,00, Klub SDP-a predlaže da to bude do 17,00 časova, u ljetnom periodu, a da subota ostaje onako kako je predložena.Da vam kažem da je to i logično.Oni ljudi sa strane, osoblje, dali mladež, dali stariji, srednje dobi itd., svakog košta 2,00 KM.Prema tome dajemo malo lufta da čovjek malo prošeće.I drugo Klub je donio zaključak da upravljač parkinzima, do septembra mjeseca, a to jest za septembarsku sjednicu Vijeća, pripremi izvještaj ili informaciju sa finansijskim izvještajem i što bude bolja i tačnija, bit će bolje za upravljača tim parkinzima.Nema razloga da to ne bude onako kako treba urađeno i da vidimo ako negdje ima slabosti da popravljamo.Ako ima dobrog da pohvalimo i da otklonimo ono što je negativno“.

#### **Hasan Puškar:**

„Pod broj jedan privatna firma d.o.o. upravlja parkingom i mi nemamo nikakva prava ni pravnog osnova da tražimo da nam neko podnosi finansijski izvještaj.Druga stvar, moje

lično mišljenje, a opet, ja ću poštovati stav Kluba. Što se tiče ovih vremena, što sam rekao nulta zona, to znači oko centra grada. Subotom rade neka preduzeća i normalno da treba naplaćivati parking. Ali naselje Riječka i ostali dijelovi mislim da tu ne treba naplaćivati u dane vikenda i praznicima. Ko hoće ostavi auto na parking u Riječkoj i ode u centar na kafu i dobije kafu džaba što se tiče parkinga. Ako hoće da bude gospodin neka plati to i subotom. Bili smo znači tolerantni kao neki osnivački partner nosilac prava određivanja radnog vremena i mislim da je to pošteno s naše strane. Druga stvar, u ljetnom periodu imamo priliv i većeg broja stranaca i što nebi mi do 20 sati naplaćivali parking. A omladina, ja ne znam koja to omladina izlazi do dvadeset sati ljeti. Koliko ja znam oni idu samo u noćni život. A zimi, ranije se smrkava tu bi možda mogli ići na 17 sati, ali opet trebamo shvatiti. Trenutno gledamo da, neko će drugi upravljati parking prostorom. Mi direktno time utičemo na priliv sredstava, tom ko upravlja. Pa nemojte da sutra dođemo u situaciju da mijenjamo Odluku radi nekog drugog. Bolje da napravimo pauzu i usaglasimo stavove u vezi ovog i donesemo kvalitetnu Odluku“.

### **Hasić Ibrahim**

„Mi smo, ovdje vijećnici malo čudni. Nekad bi zavirivali u tuđe džepove, u tuđe avlije i imovinu a u javno dobro ne, pa ne znam šta se dešava sa tim javnim dobrom. Ja se slažem sa kolegom Hasanom da je to privatna firma, ali otkud nama pravo da mi dajemo takvim institucijama. Nije to babovina ničija, to je javna površina. Prema tome za javnu površinu neko treba nekome da podnese nekakve račune. Ako je za pohvaliti, pohvalit ćemo, ako nije, sankcionisat ćemo i tako dalje. Nemojte da dijelimo, ko ima volju da dijeli neka ponese od kuće svoje pa neka dijeli“.

### **Hasan Puškar:**

„Javno dobro i kad se izdaje za korištenje javnog dobra i slično, mi treba da naplaćujemo koncesiju ili neku drugu vrstu naknade. A to što smo mi propustili i što to ne pratimo to je druga stvar. To znači, možemo tražiti, a mi u finansijski izvještaj privatnog preduzeća 100 % nemamo pravo. Možemo tražiti da plaća naknadu, a i ono za parkomate, dali daju ili ne to je druga stvar“.

### **Hasić Ibrahim:**

„Vidite, sve to ima svoje. Vijeće je ustupilo i neka je ustupilo, ali mora se znati prihod u tome. Automate je platio, ko je platio. Znači sve je ustupljeno i sad da bi ti tražio da vidiš kako to funkcioniše nemamo pravo. A slažem se, znam ja Hasane šta je privatna imovina i nema u nju niko pravo zavirivati ali ono što sam ti ja dao, treba da položiš račune. Ja ne sumnjam uopšte u tu instituciju upravljača tim parkinzima. Za njih je bolje, što budu bolje radili i što podnesu izvještaj ovom Vijeću ili hajmo na koncesije“.

### **Edin Šehić:**

„Evo vidim da se otvorila žustra rasprava. Pratio sam većinu vas koji ste bili u prošlom sazivu Vijeća kad se sve ovo dešavalo, bit će ovo burno kad se sve ovo dešavalo, bit će ovo burno sigurno u narednom periodu. Ali, ono što smatram, da mi ovdje želimo da postignemo, neko zadovoljstvo među našim građanima, pogotovo našim turistima koji dolaze u ljetnim periodima. Da napravimo neki kompromis, evo mislim da smo blizu neke sredine. Da ovo što je Hasan predložio, složio bih se u ljetnim danima za zonu nula, da bude do 20 sati i do 17, a u ovim ostalim zonama ljeti da se naplaćuje do 18, a može ostati do 17 u zimskim periodima u ostalim zonama. Mislim da je to najbolji kompromis i da tako pokušamo usvojiti“.



### **Mirzet Topčagić:**

„Kad smo donosili Odluku o ustupanju naplate parkinga, da je ta Odluka donešena na godinu dana. Mislim da je kolega Puškar u januaru ili februaru ove godine izašao sa inicijativom gdje je tražio produženje uz obračun tog perioda. Definisano je, mislim bilo da d.o.o. RVI Comerc je dužna bila podnijeti Izvještaj za 12 mjeseci. Imaju zapisnici i to se može provjeriti. Znači da nas informišu o finansijskom poslovanju, broju uposlenih. Da bi se razmatralo, znači, dali ćemo produžiti, ustupanje naplate parkinga pomenutom društvu ili ne. Koliko se ja sjećam tad su imali na spisku 13 zaposlenih, a evo direktora i može to potvrditi. Oni su tada nama predložili i projekciju prihoda od nekih 480.000 KM, po nekom Planu i programu i mislim da je direktore septembar već 12 mjeseci, da vi ipak nama pripremite informaciju. Vi ste to prihvatili da nam podnesete Izvještaj o finansijskom poslovanju. Znam da je kratak period, ali nas ipak možete informisati da mi vidimo šta ste radili. Takođe trebate nam podnijeti izvještaj, koliko je uposlenika, dali je broj povećan ili šta ste sa viškom prihoda, dali ste organizovali neke pomoći vašim članovima i slično. Mislim da bi mi to sve ovdje trebali imati u nekoj pisanoj formi i tek onda da uđemo u raspravu šta i kako dalje sa naplatom parkinga“.

### **Hasan Puškar:**

„Da ne nastavljamo raspravu, jer mi odosmo u drugom pravcu. Sve je to uredu, ali hajmo zakazati za slijedeću sjednicu Izvještaj da se podnese, a sad da se fokusiramo na radno vrijeme i ako treba da uzmemo pauzu i usaglasimo ovu odluku. Ako može jer smo otišli sa tačke dnevnog reda“.

Sjednicu je kratko nastavio voditi zamjenik predsjedavajućeg Almedin Devedžić.

### **Krajinović Nihad:**

„Ja sam upravo to htio da kažem, da ne odlazimo od teme, a to je radno vrijeme plaćanja parkirališta na području grada i da se vratimo na to. Želim ovo da kažem, šta je bio cilj postavljanja parkomata u gradu? Da smanjimo broj vozila u užem gradskom jezgru. Dakle na ulicama u gradu. Dakle, da naplatimo i da ljudi iz tog razloga što manje u centar grada dolaze s vozilima i negdje drugo ga parkiraju. Prvenstveno da građane koji žive u gradu natjeramo da voze po kifle sa autima u centar grada. Ovo sam htio da kažem. Ovdje se govorilo o tome da olakšamo, evo mladima da ih kafa npr. košta marka, a ne dvije marke. Mi smo i prije na Vijeću u starom sazivu govorili o tome kako i privrednicima na neki način olakšati dolazak u grad. Oni imaju poslova u institucijama, bankama i slično. Po tome bi se trebali voditi, pa nekoliko parkinga oko banaka ostaviti prazno za privrednike, da i njih ne košta skupo predavanje pazara i rješavanje tih njihovih potreba u samom centru grada. I ono još što sam htio da kažem, jeste da smatram, da parkomati ipak trebaju da se naplaćuju bar do 19 sati ili 20 sati u ljetnom periodu, a u zimskom se slažu da se može skratiti“.

### **Rahim Gadžić:**

I ja bih nešto dodao. Prije godinu dana kad smo donosili Odluku o davanju saglasnosti na upravljanje parking mjestima organizacijama RVI-a i ovoj našoj firmi koja to radi, svi smo bili malo skeptični, ali vidimo da su oni ipak postavili reda i da su odradili one zadatke koje smo mi od njih tražili. Smatram da će u narednom periodu parkinzi biti obilježeni, da se ne stvaraju velike gužve, ima često slobodnih parking mjesta, ne koriste se više kao garaže u Gračanici. Ja bih u svakom slučaju pohvalio organizacije koje rade taj posao oko parkinga i smatram da bi trebali oni i dalje da nastave to raditi. A što se tiče Izvještaja ima Komisija koja će sa njima uspostaviti koordinaciju, razgovarati i u narednom periodu ono što je do Vijeća da razmatra, doći će do nas, za neku od narednih sjednica. Ja lično u svoje ime pohvaljujem ljude

koji su radili na parking mjestima, jer su puno, puno reda uveli. A oko radnog vremena slažem se da uzmemo pauzu i usaglasimo se o tome“.

### **Mirsad Čamdžić:**

„Ja samo nekoliko stvari što kolega Gadžić kaže tačno, napravljen je red. Slažem se i sa izlaganjem kolege Krajinovića koji je rekao o motivima ulaska u ovaj projekat. Ali postoji još jedna stvar koju trebamo uzeti u obzir. Svi vlasnici radnja u centru grada se žale da im je opao promet, samim tim i posjeta centru grada. Radi se o banalnoj stvari, teško je pod jedan pazuh staviti dvije lubenice. O čemu se radi. Oni komentarišu, da ljudi za taj parking koji traje sat vremena, treba da stanu i obave za pet minuta neki mali biznis. Međutim, odlučuju se, ali tu moram dati marku, oni odlaze pred tržni centar, gdje je parking slobodan i tu obave šoping. Znači imamo jedan aspekt koji niko nije mogao predvidjeti. Kako smo ovo regulisali, nekako smo i ljude iz centra grada dislocirali prema industrijskoj zoni. Čak je bilo prijedloga da se uvede polusatni parking sa pola marke i slično, za brze te izlaske u centar grada. To je aspekt o kome možemo raspravljati u narednom periodu“.

### **Hasan Puškar:**

„Nije tačno, ti očito ne plaćaju parking, ti što tvrde da je tako. Ubaciš 20 feninga i tu se parkiraš za 20 feninga. Znači parkiram se 20 minuta, petnaest minuta. Niko nije rekao da moraš platiti marku. Nije tačno ni to da će neko nekom staviti kandžu ili slično petnaest-dvadeset minuta sigurno možeš tu stajati neće ti niko ništa. Prvo ljudi stave opomenu, pa prođe i pola sata da reaguju. Ko ide u banku i slično, on nije ničim oštećen. Ovdje su oštećeni plaćanjem parkinga oni što hoće šetati po čaršiji, piti kafe itd. Ne oštećeni, nego se smatraju oštećenim. Druga stvar parking nije obavezan platiti sat vremena, ima i drugih cijena“.

### **Osman Sulejmanović:**

„Ibrahim je tražio Informaciju, Hasan se odupro Informaciji, a mislim da se ima o čemu raspravljati. Predložio bih da uzmemo pauzu i usaglasimo Odluku o radnom vremenu, a da nam se dostavi Informacija o radu ne d.o.o. RVI Comerc, nego o radu i funkcionisanju parkinga. Nego o korištenju i naplati parkinga, a ne o radu d.o.o. RVI-a“.

### **Arnes Avdić je zatražio u ime Kluba BPS-a pauzu.**

Nakon pauze konstatovano je da je u sali prisutno 23 člana Općinskog vijeća.

### **Predsjedavajući Vijeća je iznio slijedeće:**

„Kolegij Vijeća je usaglasio tekst Odluke o izmjenama i dopunama Odluke o javnim parkiralištima na području općine Gračanica kako slijedi

U Odluci o javnim parkiralištima u članu 8. stav 1. mijenja se i glasi: „Na javnim parkiralištima na kojima se naplaćuje parkiranje radno vrijeme će biti određeno kako slijedi:

Radnim danima:

- u ljetnom periodu od 01.05. – 30.09. utvrđuje se radno vrijeme od 06,00 do 20,00 sati.
- u zimskom periodu od 01.10. – 30.04. utvrđuje se radno vrijeme od 06,00 do 18,00 sati.
- subotom, tokom cijele godine u periodu od 06,00 do 13,00 sati.

Kolegij predlaže da se u članu 7. stav 1. u tabeli pod tačkom 9 „PKSC“ u oznaci zone tekst „sezonski I zona“ zamjenjuje sa riječima „po posebnoj Odluci“.

Odluka je data na izjašnjavanje. Sa 20 „ZA“ i 5 „SUZDRŽANO“. Pošto se nije složio broj glasova sa brojem prisutnih Avdić Arnes je izrazio sumnju na rezultate, nakon čega se prešlo na poimenično glasanje.

Sa 17 glasova „ZA“ i 6 „SUZDRŽANO“ usvojena je Odluka o izmjenama Odluke o javnim parkiralištima na području općine Gračanica uz zaključak da organizacija i firma koja se bavi parkiralištima, kojom nadzori i naplaćuje do 15.9.2017.godine pripremi Izvještaj i dostavi Stručnoj službi kako bi se ista dostavila Vijeću na razmatranje.

## **TAČKA 5**

### **RJEŠENJE O IMENOVANJU ČLANOVA NADZORNOG ODBORA JP “VETERINARSKA STANICA” GRAČANICA.**

#### **Hasan Puškar je iznio stav Komisije za propise i Statut:**

„Komisija je većinom glasova podržala rješenje o imenovanju ali traži da se svim članovima Općinskog vijeća dostavi zapisnik Komisije za sprovođenje procedura izbora članova Nadzornog odbora. Znači mi podržajemo rješenje“.

Predsjedavajući Vijeća je konstatovao da je zapisnik dostavljen svim vijećnicima.

Za diskusiju se javio:

#### **Džemal Jukan:**

„Ja odmah da kažem da će Klub Stranke za BiH podržati ova rješenja ali će svejedno da neke primjedbe uputi na konkretnu proceduru koja je vršena. U konkursu koji je objavljen, tamo stoji da kandidati moraju imati certifikat o položenom ispitu o menadžerstvu i ne znam kako tamo stoji već ili da daju izjavu da će to završiti u određenom roku. I sad, ljudi su konkurisali. Ako je to već stavljeno u konkurs, evo ima komentara da to ne treba i ako je neko konkurisao i ima položen taj ispit, on ima prednost u odnosu na onog ko izjavljuje da će to uraditi u nekom narednom periodu. Nisu to iste stvari, ja se slažem, ukoliko niko ne konkuriše ko ima položen taj ispit - certifikat, može se uzeti taj koji je dao izjavu da će završiti u narednom periodu. I to bi bilo normalno. Međutim, evo sami sebi iskomplikujemo i onda može doći do tužbe, do žalbe i ne znam šta. Na kraju mi ćemo evo donijeti Odluku da ćemo prihvatiti ove kandidate koji su potpisali izjave da će završiti ovo. Ja postavljam pitanje šta nam je garancija ako ne završi? Hoćemo li ih smijeniti? Ima li u rješenju jesmo li napisali, rješenje je privremenog karaktera, jer ste dužni, ne znam, uraditi to i to. Ali evo da ne komplikujemo, podržat ćemo to, samo hoću da kažem da i neke procedure koje se provode, treba povesti računa da sami sebi ne komplikujemo. Toliko“.

Rješenje o imenovanju članova Nadzornog odbora JP „Veterinarska stanica“ Gračanica je usvojeno jednoglasno.

## **TAČKA 6**

### **SAGLASNOST NA ODLUKU O IZMJENAMA STATUTA JP “KOMUS” D.O.O. GRAČANICA.**

Za diskusiju se javio Šakušić Ahmet i iznio stav Kluba SDP-a:

„Klub vijećnika SDP-a će podržati Odluku o izmjenama i dopunama Statuta JP „Komus“ d.o.o. Gračanica i čestita upravi i radnicima na izgradnji nove upravne zgrade“.

Jednoglasno se usvaja saglasnost na Odluku o izmjenama Statuta JP „Komus“ d.o.o. Gračanica.

## **TAČKA 7**

### **IZVJEŠTAJ O IMPLEMENTACIJI PROJEKATA PO JAVNOM POZIVU ZA NEVLADIN SEKTOR OBJAVLJENOM U 2016.GODINI.**

Nije bilo dodatnog obrazloženja, a učesnici u diskusiji po ovoj tački dnevnog reda su:

#### **Demir Milkić:**

„Pa evo, ovo je jedan svakako ogroman materijal sa puno informacija. U uvodu je napisano da je od 32 nevladine organizacije koja je na projekte aplicirala, 24 su odobrene, što je preko 70 % i najviše mi je drago što je teritorijalna zastupljenost ispoštovana. Iz Lukavice, znači, iz Gračanice, Stjepan Polja, podržavane su organizacije sa sredstvima i Klub SDP-a će svakako ovo podržati“.

#### **Almedin Devedžić je iznio stav Komisije za obrazovanje i kulturu:**

„Evo ja ću u ime Komisije da pohvalim ovaj Izvještaj i njegovog izvjestioca gospođu Almu Buljubašić. I drago nam je što je, da kažem po prvi put smo dobili napismeno detaljan Izvještaj ko je dobio, šta je dobio, koliko je dobio, na osnovu čega, tako da možemo reći da ovu praksu trebamo nastaviti i dalje“.

#### **Šehić Edin:**

„Evo i ja bih se pridružio kolegi Almedinu, čestitam za ovaj obiman izvještaj. To je gro stvari koje idu u korak s vremenom što pokušavamo da malo stavimo „u suru“ i ove nevladine organizacije da moraju transparentno da troše sredstva i naravno da pravdaju. A ovdje naravno to treba nama doći u formi izvještaja. Ja bih samo, obzirom da sam sudionik u većem dijelu projekata kao koordinator i onaj koji kreira određene projekte želim istaći da ovde u Izvještaju stoji da je implementirano 26 projekata i ukupne planirane vrijednosti 176.589 KM. Da bi shvatili da je to zaista tolika vrijednost tih projekata, nije, obzirom da se od Opštine traži malo značajniji iznosi za projekte, ali se dobije dosta manje. Tako da i ti projekti su u svojoj konačnici dosta skromnije završe, ali opravdavaju se ciljevi i one stvari koje trebaju u projektu. Dakle, ukoliko od opštine tražite predloženih 50 % tako stvarate svoj budžet za drugih 50 %. Ovdje mene što interesuje, obzirom da vidim da je ovo po LOD Metodologiji rađen izvještaj i radit će se naravno na poziv za nevladin sektor, da li će se u buduću samo razdvajati ovi izvještaji gdje su sve nevladine organizacije koje su imale određene projekte. Da li će se u ovom budućem izvještaju razdvojiti nevladin sektor i omladinski sektor obzirom da su raspisani javni pozivi iz dvije stavke budžeta. To je neka moja zamjerka, a mi iz Stranke za BiH ćemo podržati ovaj Izvještaj“.

Izvještaj o implementaciji projekata po javnom pozivu za nevladin sektor objavljenom u 2016.godini je usvojen jednoglasno.

## **TAČKA 8**

### **INFORMACIJA O AKTUELNIM PRIVREDNIM KRETANJIMA**

## NA OPĆINI GRAČANICA U 2016.GODINI.

Nije bilo dodatnog obrazloženja, a učesnici u diskusiji su:

### **Mirzet Topčagić:**

Klub vijećnika SDP-a Gračanica je razmatrao Informaciju o aktuelnim privrednim kretanjima na općini Gračanica u 2016.godini i evo u ime Kluba kažem da mi ovu Informaciju prihvatamo. Iz Informacije se može pročitati da je visina ostvarenih prihoda skoro pa identična prošloj godini, ustvari veća je za 1 %, ali vidimo da se ukupna dobit koju su naša preduzeća ostvarila u odnosu na proteklu godinu znatno povećala. Ono što nas zabrinjava, a vjerujem da je i svima vama zasmetalo, to je podatak da Općina Gračanica ima prosječnu plaću ispod 600 KM, ustvari prosječna neto plaća na Općini Gračanica je 541 KM, što je ispod prosjeka u odnosu na iznos potrošačke korpe za četveročlanu porodicu i ova visina prosječne neto plaće, Gračanicu postavlja na začelje u F BiH kada je u pitanju ovaj kriterij. Naravno ovako nizak nivo neto plaća direktno se odražava i na nizak nivo penzija koja iznosi 338 KM i tu Gračanica nije na zavidnom mjestu, kada se uporedi sa ostalim općinama na TK-a. Iskreno se nadamo da će se ovo stanje iz godine u godinu poboljšavati, ali evo donošenjem novog Zakona o radu i podizanjem minimalne neto satnice, kao i ograničavanjem visine neoporezivog dijela toplog obroka, već u ovoj godini možemo očekivati određeni napredak“.

### **Safet Pjanić:**

„Ovo je jedna vrlo važna Informacija za nas, za našu Opštinu i mislim da je materijal dosta dobar, da je precizirao sve.Ima možda malo nekih nedostataka, recimo na strani 13, kaže sa jednim brojem 107 firmi, zaposlenih 158, što meni nije jasno, kao i što je upečatljivo i što je vidljivo da su uglavnom to recimo od 2 do 8, 208 firmi, 4,5 prosjek radnika.Po meni je možda tabela ovdje na ovoj strani gdje se ubacuje prosječan broj uposlenih.Ovo što je rekao Mirzet vidi se da su naše firme dosta dobro radile u 2016.godini, što govori da su dobili kod pojedinih firmi povećane za 100, 200, pa čak i više posto. I što uglavnom tih 20 malih novih firmi na našoj opštini je želja da im bude što kažu top 30. Čitao sam u novinama gdje pojedini stručnjaci upozoravaju, kad je u pitanju BiH, nedostatak radne snage pa govore uglavnom koja su to zanimanja. Jedan od njih kaže da su poslodavci dužni da nađu način kako da radnike dugoročno zadrže. Po meni je jedini način povećanje plate. Ja radim u kompaniji u koju je ušao jedan Njemačko-Austrijski partner koji je digao platu u neto iznosu za 50 KM, povećao plate da kažem dosta u bruto iznosu i da su sad plate odprilike blizu gračaničkog prosjeka, a pored toga obećao je i regres za godišnji odmor.Znači nakon rata, po prvi puta da se da radnicima regres za godišnji odmor.Mislim da to treba da bude primjer drugim poslodavcima da se samo povećanjem plate mogu radnici zadržati u fabrikama i da možemo imati jedan kontinuitet.Svaki dan se čuje da radnika nema, a kako kaže jedan moj prijatelj radnika ima, samo treba dobro platiti“.

### **Džemal Jukan:**

„Evo i ja se pridružujem čestitkama i uspjehu naših privrednika, ali mislim da je mjesto da treba pomenuti i reći i onu drugu stranu.Mislim da imamo problem o kom se malo govori i zna se puno u javnosti, ali se o njemu ne priča.Na žalost, većina naših uposlenih su osigurani na minimalna primanja i tako se uplaćuje i PIO i zdravstvo i na žalost proizvodimo buduće generacije, kako to kažu, hoće li po kontejnerima tražiti i neće imati za život, za lijekove itd.To su istine i moramo to reći.Ovdje ja pozdravljam Safete i ovo, menadžment dole i svi koji povećaju platu, ali bih ja zamolio da mi samo platimo ljude odnosno da onu koliku im damo platu, da im to uplatimo i PIO i zdravstvo jer će to imati sutra kad budu ostvariti pravo na penziju, hajde da kažem, normalno, da mogu živjeti i uživati u toj penziji ako je zarade.Veliki su to problemi, ja pozdravljam dobiti, ali moramo mi tu biti realni, idu

ljudi i hvala bogu neko će raditi u tim halama, neko će zarađivati platu. Međutim izostao je ovaj socijalni dio, koliko radniku treba dati, koliko su i oni zaradili pa evo stidljivo, hoće li to biti regres, hoće li biti nešto i taj realni sektor što kaže mislim da i o tom treba govoriti. Pored ovih uspjeha gdje to ide, ta dobit nas nosi u svemu, međutim ova solidarnost i gdje je uposlenik u svemu tome. I mislim da će poslodavci imati veliki problem po pitanju radne snage u narednom periodu. A jedini motiv koji se može je plata i uplatiti sve ono što treba radniku uplatiti da bi eventualno sutra uživao u penziji.

Informacija o aktuelnim privrednim kretanjima na općini Gračanica u 2016. godini je usvojena jednoglasno.

## **TAČKA 9**

### **INFORMACIJA O STANJU PUTNE INFRASTRUKTURE NA PODRUČJU OPĆINE GRAČANICA.**

Nije bilo dodatnog obrazloženja, a učesnici u diskusiji su:

#### **Alen Ibrišević:**

„Komisija za urbanizam i ekologiju na svojoj sjednici prije dva dana razmatrala je i ovu tačku dnevnog reda. Mi smo imali nekoliko primjedbi, ali su one tehničke prirode. Prva primjedba jeste da se ovamo ne slaže, na drugoj strani gdje kaže mreža lokalnih cesta koju čine 40 cesta ukupne dužine 136,24 KM, dok u tabeli imamo 134,87 KM, pa to da se popravi. Druga zamjerka bila je ta da imamo nekih putnih pravaca kao što je ovaj Doborovci Gornji-Serhatlije-Prijeko Brdo gdje se kaže prvi kilometar ceste je makadam u veoma lošem stanju. Pošto je ova cesta urađena i sada je ona dobra, primjedba je bila da se navede onako kako jeste stanje na terenu“.

#### **Sulejmanović Osman:**

„Klub SDP-a je razmatrao ovu Informaciju istu prihvata, ali ja ću iznijeti svoje primjedbe. Treba nastaviti sa dogradnjom ove Informacije i da iz ove Informacije proizađe Plan ljetnog održavanja. Znači imamo zimsko održavanje, a sad bi trebalo proizaći ljetno održavanje. Mislim da nam je sramota ulaska u pojedine MZ, u kojem su stanju bar oni lokalni putevi prema centru MZ. Trebalo bi bar za početak vidjeti i predlažem da se napravi nekakav plan da se iz ovih sredstava održavanja lokalnih puteva i ulica da se pokuša sa firmom „ROADING“ pošto ima mehanizaciju za košenje i sječenje živica i trave i to da se s njime pokuša ugovoriti i za početak da se odradi jedan put godišnje. Evo ja sam prije ove sjednice imao jedan poziv iz Malešića nije, nego od jedne firme da se izvrši rasjeka puta prema Malešićima jer gore porazbijasmo retrovizore, koliko je zaraslo, prema kamenolomu. Nema više radnih akcija, to je prošlo. Ja ovo predlažem da napravimo program i da se ova sredstva utroše za to. Mi smo ovi ovdje oni koji usvajamo budžet i kreiramo ga. Za naredni budžet treba predvidjeti više sredstava daleko više sredstava za održavanje čini mi se da u ovom sad budžetu ima negdje oko 40.000 KM za održavanje. To je premalo i do nas je sad ovdje da to rješavamo“.

#### **Nejra Hadžić:**

„Ja bih samo da iznesem stav Kluba SDA. Imajući u vidu stanje u kojem se nalazi cestovna mreža na teritoriji naše opštine, pohvalno je što smo dobili Informaciju o stanju putne infrastrukture na području opštine Gračanica, te istu u potpunosti prihvatamo, s tim da se dalje iznalaze mogućnosti na održavanju cestovne mreže, asvaltiranih i makadamskih puteva, kao i asvaltiranje novih“.

### **Mirzet Topčagić:**

„Ja bih samo postavio pitanje. Kad je zadnji puta ova Informacija ažurirana, odnosno da se izašlo na teren, evidentirale promjene. Naime, ima ovdje dionica puteva koje nisu prikazane, a sada su već i asfaltirane. Konkretno evo govorim za MZ Soko fali jedna kompletna dionica, a to je Soko-Centar-Ilidža i tamo skroz onaj jedan kružni pojas koji je od prilike 2-3 kilometra od asfaltiranog puta i jedan dio je oštećen, a jedan dio je u jako dobrom stanju, a ovdje ga ne vidim nigdje. Ovo govorim zato što iz godine u godinu dobivamo ovakve informacije vjerovatno copy-paste, gdje bukvalno, jeli ja znam lično u Sokolu da nisu svi putevi tu, a asfaltirani su“.

### **Rahim Gadžić:**

„Kolegica je iznijela stav Kluba, ali ja kao Općinski vijećnik i kao predsjednik Mjesne zajednice ne mogu, a da ne izađem za govornicu i ne kažem nekoliko riječi. Prvo da se zahvalim uposlenicima koji rade na ovim projektima i poslovima jer smo imali jako dobru saradnju sa mojom Mjesnom zajednicom. Kad god smo nešto zatražili izašli su na teren i uradili smo sve što je trebalo da uradimo. Ovo je prilika i ujedno da im se zahvalim, meni puno znači kad se odazovu na pozive kad imamo dobru saradnju koja je nama u Mjesnoj zajednici i potrebna. Asim je jako konkretno radio sve poslove i evo vidim da ovaj Odsjek nije u Službi šefa Zijada Dedića, a ja se i toj Službi zahvaljujem na dosadašnjoj saradnji i čuli ste već Informaciju će Klub SDA podržati“.

### **Džemal Jukan:**

„Evo i ja ću se isto zahvaliti na Informaciji, ali kad sam malo analizirao, recimo Mjesna zajednica Gornja Lohinja i kaže se tamo koji je put sve urađen i asfaltiran, koji dolazi u Mjesnu zajednicu, pa nastavlja prema Gornjoj Orahovici, onda se u jednom dijelu kaže kilometar neprohodan. Mislim to je činjenično stanje i to je tako. Hoću da kažem, jeste to mlada Mjesna zajednica, međutim oni su imali 4 ili 5 alternativnih puteva, svi su u prekidu. Put iz Gornje Lohinje preko sjedaljke koji ide do Seljanuše ovamo sjelina je i u prekidu je i više ga i nema. Put za Đuriće, sjenina je pokrenula i nema ga. Put prema Žužama, pa onda izađe na Drafniće, nikad ustvari nije i urađen dole prema Širbegu, tako da i njega više nema. Svi ti alternativni putevi su i za protiv požarne svrhe i slično, a sad ovaj jedan jedini put ide u Gornju Orahovicu u jednom dijelu od kilometar kažu da je neprohodan, prohodan je za traktore i slično, ali nije za auta. Međutim nedaj bože da se desi u Gornjoj Orahovici, a podložno je odozdo, znate klizišta da se dešavaju, jedini izlazak u Gornjoj Orahovici bi bio na Gornju Lohinju i veza sa opštinom i sa gradom. Pa evo samo što reče Osman, da iz ovoga proizađe neki plan održavanja, da neki putevi, ja mislim da se taj put i ne održava i da bar se nekad nešto uradi malo to bi bilo prohodno, a nije velika dionica a mislim da je neophodno, ne samo za Gornju Lohinju nema tu puno mještana, nego i za ove okolne mjesne zajednice“.

### **Šehić Edin:**

„Evo obzirom da je Informacija o putnoj infrastrukturi, pa me interesuje obzirom da sam na jednoj od predhodnih sjednica uputio inicijativu za označavanje mahala. Obzirom da je ovo uz puteve da li se može odmah dati odgovor od šefa Odjeljenja Asima, na koji način označiti određene mahale ili naselja? Znam da problem tamo i sa granicama ali ono bar što se odnosi na određene turističke destinacije veoma je bitno da se urade. Ja sam pored ovih puteva prolazio i kakvi su takvi su, naši su. Ali ono što bi evo dao kao prijedlog da li je moguće u narednom izvještaju, obzirom da kažu da je oštećena cesta, da udarne rupe, da ta komisija ili ko već sastavlja taj Izvještaj kaže predlaže se 20 ili 30 kubika posipnog materijala. Da mi odmah znamo koji je to prijedlog i na osnovu toga možemo doći do neke okvirne cifre šta

treba raditi na tim putnim infrastrukturama. Dakle, da se i prijedlog neke mjere navede, ne da se asvaltira što bi mi svi voljeli, ali zaista neki putevi ako su u lošem stanju, da se kaže, predlaže se 20 kubika posipnog materijala. Čisto da imamo u tim izvještajima“.

### **Općinski načelnik Nusret Helić iznio je slijedeće:**

„Evo par pojašnjenja o Informaciji. Dobro je ako ima neka greška ovo je rađeno na terenu, a ispraviti ćemo to. Dobro je da imamo jednu informaciju iz koje treba da proizađe šta je to sad što bi trebalo uraditi. I to će tako i biti. Ali čini mi se Osman ili neko drugi je predlagao da se sad radi neko održavanje iz nekih sredstava. Gospodo draga, znate li da ste donijeli Odluku i hoćete da svi podijelimo po mjesnim zajednicama i mi podijelili pare i garantujem vam da ćemo imati gore održavanje. Nije džabe do sada to išlo odavde, mi raspoložemo informacijama i gdje su prioriteti. Da znate za ovu godinu nema dinara da ja mogu intervenisati. Zato što ste rekli, dajte da mi upravljamo, pa smo rekli, pripada Babićima od onih 40.000 KM, 1.200 KM, gospodo izvolite posipajte. A građani opet nama dolaze. Nije dobro, ja sam i tad govorio, ali to možemo riješiti budžetom za narednu godinu. Nećeg se moramo odreći, a moramo izdvojiti za održavanje više sredstava, ne samo puteva, imamo mi i objekata nekih koji su naši. Sve nam to pomalo propada ako ne održavamo kvalitetno. Ovo sve što ste iznijeli, treba imati u vidu u smislu da se i ovo što Šehić kaže da se za naredni budžet predvide daleko veća sredstva da bi mogli reagovati. Ima nešto što se desi sad, preko noći, problem a mi kažemo raspoređena su sredstva po mjesnim zajednicama, ali vi ne možete sa onih hiljadu održavati. Raspoređena su i vi ste obaviješteni koliko vam pripada za održavanje puteva i ovo iz budžeta. Za Gračanicu mi još uvijek radimo direktno. Dakle, moramo izdvojiti veća sredstva, a prilika je slijedeći budžet ili rebalans. Evo slijedeća tačka dnevnog reda traži da se odrekemo nekih prihoda pa prihvatite i to, i onako smo kraći za prihode od PDV-a. Ovo je dobra osnova, Informacija, ali da planiramo više sredstava za održavanje i rješavat ćemo to“.

Informacija o stanju putne infrastrukture na području općine Gračanica je usvojena jednoglasno.

### **TAČKA 10 RADNA VERZIJA ZAKONA O DOPUNAMA ZAKONA O POREZU NA PROMET NEPOKRETNOSTI.**

#### **Uvodno obrazloženje dao je Općinski načelnik Nusret Helić:**

„Evo vi ste dobili materijal, dobili ste mišljenje Ministarstva, dobili ste mišljenje načelnika i zahtjev za promjenu Zakona. U njemu su navedeni razlozi za odbijanje ili negativno mišljenje na ovaj Zakon. Ja vjerujem da ste iz obrazloženja shvatili opravdanost negativnog mišljenja kad je u pitanju ovaj Zakon. Ponovo se evo po ko zna koji put pokušava preko općina ili općinskih prihoda rješavati zahtjevi pojedinih privrednika. Oni koji su bili u Vijeću prošli mandat, sjećaju se jednog zahtjeva za izmjenu Zakona od Udruženja poslodavaca Gračanice, da ne kažem i Kompanije „Širbegović“ da se privredni subjekti oslobode uopšte plaćanja poreza na promet. To je isključivi prihod općine, jedini izvorni prihod općina je porez na promet nepokretnosti i čitav kad se uplati dolazi općini. I evo vidjeli ste svi kantoni, regulisali su da se plaćaju porezi na ovo zašto oni traže izmjenu. Ako naše Vlade, jedna Kantonalna, Federalna, žele a moraju pomoći na nekakav način privredi i rasterećenjem i ambijentom, gospodo draga, neka smanje porez na dobit, porez na dohodak gdje je sav njihov prihod, a ne na i ovako male lokalne budžete. Još se treba odreći i ovog prihoda i predlažu da to ide na račun lokalne zajednice. Ja mislim da je to nekorektno i evo, dok sam ja tu, gdje jesam, trudiću se da ova vrsta poreza, jer ona ne znači ništa posebno tamo onima za koje se traži oslobođenje. Ružno je upotrijebiti neki izraz, to su ljudi koji imaju



novac, ljudi koji kupuju u stečajnom postupku to sve i pogotovo što se odnosi samo na i imovinu javnih preduzeća. Dakle, moje je mišljenje i očekujem da Vijeće podrži, jer oni su obavezni tražiti mišljenja lokalnih zajednica, kad su u pitanju interesi i prihodi lokalnih zajednica i vjerujem da će se većina općina izjasniti negativno. Ja znam da je Tuzla u ovom momentu naj interesantnija za ovo oslobađanje, zato što u Tuzli ima puno tih postupaka. Možda nas ne zakači, ali može nas u jednom momentu zakačiti i nama je prihod u pitanju. Morat ćemo se odreći puno toga, a evo neka nam je bog na pomoći sa budžetom od deset miliona, mi se nosimo ovih godina, a toliko se izdvoji i po osnovi raznih prihoda prema državnoj kasi. Na žalost takva je preraspodjela i ja vas molim i tražim da podržite moje mišljenje“.

#### **Osman Sulejmanović je iznio stav Komisije za budžet:**

„Na sjednici Komisije za budžet razmatrana je radna verzija o dopunama Zakona o porezu na promet nepokretnosti i prava pa je zaključeno slijedeće:

- Komisija podržava izmjene Zakona s tim da se obuhvati i privatni sektor, da se izbjegne diskriminacija između privatnog i društvenog sektora.

- Da se član 29. dopuni i da primjena Zakona ne ide retroaktivno, odnosno da se primjenjuje od dana objave.

- Mišljenje Komisije je da će ova dopuna Zakona o prometu nepokretnosti i prava trenutno negativno uticati na punjenje budžeta, a da će se to kasnije kroz poreze i doprinose namiriti“.

#### **Puškar Hasan je iznio stav Komisije za propise i Statut:**

„Komisija za propise i Statut, razmatrala je takođe radnu verziju Zakona o porezu na promet nepokretnosti i u potpunosti je podržala mišljenje načelnika“.

Učesnici u diskusiji su:

#### **Mirzet Topčagić:**

„Klub vijećnika SDP-a Gračanica razmatrao je predloženu inicijativu Udruženja poslodavaca TK-a i naše mišljenje je da bih se usvajanje navedenih oslobađanja direktno odrazilo na pad te vrste prihoda u općinskim budžetima koji su već jako mali i nedovoljni. U našim materijalima u prilogu smo dobili i mišljenje Općinskog načelnika o ovoj Inicijativi i evo ja ću iznijeti stav našeg Kluba, koji je identičan sa mišljenjem Općinskog načelnika, a to je da se ova inicijativa odbije“.

#### **Džemal Jukan:**

„Pa evo ja sam se i na Kolegiju već izjasnio, ne znajući za mišljenje načelnika. A rekao sam i tad da je moje mišljenje da ova društva koja su u stečaju, da je njihova cijena već, neću reći da je devalvirala nego je do te mjere interna da nebi bilo korektno i nije pošteno i to što se kupi jeftino da se na to ne plaća porez. To je bio moj prvi komentar što znači da prijedlog načelnika i ja podržavam“.

Nije bilo više učesnika u diskusiji i predsjedavajući Vijeća je dao prijedlog načelnika da se odbije inicijativa, na izjašnjanje.

Jednoglasno se usvaja prijedlog i mišljenje načelnika.

Sjednica je završena u 14,25 sati.

**ZAPISNIK VODILA:**

**Mevlida Naimkadić**

**PREDSJEDAVAJUĆI  
OPĆINSKOG VIJEĆA  
Nihad Krajinović**